

# 历年祭孔大典祭文②

## 庚寅(2010)年祭孔大典祭文

许嘉璐

维公元2010年先师孔圣夫子诞日，谨备时蔬玄酒，雅乐升舞，恭奠于大成殿阶下，肃拜追远，上达夫子暨诸先哲先贤。其辞曰：

吾国文明，渊源何远！洪荒无征，蒙昧万年。既历三皇，五帝相衔；贤哲冥思，归之鬼天。吾侪何来？终将何还？何者为福？何者为善？生应何求？何为圣贤？茫茫长夜，踽踽盘桓。逮及文武，民听达天。周制礼，明德尚贤。享祚八百，维系血缘。尾渐不掉，王室东迁。霸者问鼎，逐鹿中原。强则陵弱，富者欺寒。悖逆诈伪，淫佚兴乱。岁岁征伐，竟无义战。呜呼夫子，生悯人寰。少贱多能，屡经磨练。复礼兴乐，欲挽狂澜。己立立人，孝弟唯先。修齐治平，悦迓来远。游说列国，不惧厄难。杏坛论学，大同是盼。人心驱霾，晨曦乍现。道虽不行，学统绵绵。与时俱进，巨匠迭见。孟轲弘发，荀卿敷衍。董生继后，道法兼含。南北一统，合而有辨。孔贾拘守，昌黎呐喊。迄宋大兴，如日中天。程朱相续，周张并肩。出入佛道，孔孟真传。人参天，敬而自反。天理良心，理学体完。知行合一，世界峰巅。沉沉浮浮，倏尔千年。伟哉中华，千劫万艰。百折不挠，国泰民安。环顾全球，熙攘纷乱。一如春秋，冲突不断。弱肉强食，贪欲泛滥。嗟我夫子，所述皆验。文明对话，五洲共愿。仁恕之道，日益播散。促进和睦，中华奉献。谨此上达，慰我圣贤。伏惟上飨！

## 辛卯(2011)年祭孔大典祭文

杨朝明

维公元2011年9月28日，岁在辛卯，至圣先师孔子诞辰2562周年，山东各界人士、港澳台同胞、海内外宾朋，谨备蔬果鲜花，献以乐舞，敬告夫子之圣灵。

煌煌中华，郁郁文明，唐虞稽古，夏商义宁。文武周公，天下景从。嗟我夫子，降诞昌平。少贱鄙事，博学多能。通天之德，旁彻物情。金声玉振，爰集大成。

乾坤并立，日月代明，阴阳合和，万物蒸蒸。首出庶物，人为秀灵。礼自外作，乐由心生。好恶有节，敬德怀刑。言则忠信，行则笃敬。和而不流，与时偕行！

为政以德，仁爱百姓。举直措枉，尚贤使能。知民之欲，察民之情。富而后教，德化流行。远来近悦，万邦咸宁。

大哉夫子，既圣且明，出类拔萃，卓乎独盛。垂仪立极，百代同宗。三千弟子，惟道是弘。章句汉唐，义理宋明。远播欧美，泽及亚东。夫子精华，代代相承。

秋高气爽，玉宇澄清，社会祥和，物阜民丰。巍巍神州，荡荡德风，仁爱诚信，中华魂灵。济多士，众志成城；融古铸今，中西会通。而今而后，乃昌乃隆。炎黄子孙，祈祥鞠躬：四海一家，天下大同！伏惟尚飨！

## 壬辰(2012)年祭孔大典祭文

董金裕

维公元2012年9月28日，欣逢孔圣2563年诞辰纪念，我中华各族群同胞，以及国际嘉宾良朋，缅怀盛德伟业，以虔诚之心、景仰之情，谨备鲜花美果、佾舞雅乐，敬献于孔庙大成殿暨两庑，告祭大成至圣先师与夫诸圣哲贤儒。其辞曰：

天地设位，人在其中。天行刚健，地道宽弘。品物流形，化育功隆。人禀五常，灵秀所鍾。法天之德，效地之用。赞之参之，与之同功。唯我夫子，博通世务。上应天时，下顺风土。远宗尧舜，近法文武。删述六经，以教生徒。循序而进，孜孜矻矻。成德达材，栽培无数。仁道思想，众德汇涵。明德亲民，止于至善。推己及人，是为其方。礼以行之，益加发扬。华夏文明，赖以发皇。驯致大同，协和万邦。与时俱进，弥足珍贵。集圣大成，出类拔萃。其所成就，卓越崔巍。典型既在，吾谁与归。万民景从，仰承教诲。千秋万世，永蒙遗徽。恭逢圣诞，我心欢畅。秉持诚意，其喜洋洋。载歌载舞，俎豆馨香。奉承而进，伏惟尚飨。护佑生灵，教化其昌。乐道好礼，同沐祯祥。

## 癸巳年(2013)年祭孔大典祭文

彭林

惟夏历癸巳之年，辛酉之月，日在丁酉，恭逢大成至圣先师孔子诞辰2564年，山东省人民政府敬以释奠大典、鲜花雅乐之奉，祇告圣灵曰：

伟哉夫子，如岳之耸。德尊道隆，海内归宗。多士肃肃，庙堂雍雍。典祀有常，是仰是崇。簠簋备列，粢盛隆丰。笾豆黝黝，三牲肥充。笙箫和鸣，佾舞称容。神其来格，享此献奉。生民之初，心智懵懵。彝伦不明，长夜无穷。尧舜禹汤，文武周公。庠序养贤，开辟鸿蒙。春秋季世，纪纲失统。忧道不行，木铎警众。杏坛设教，儒学大弘。俾彼云汉，为章苍穹。为政以德，北辰是拱。仁孝为本，父子融融。忠信相交，上下股肱。日升月恒，泮水辟雍。明德新民，君子之风。性情和达，乃为中庸。诗礼传家，开我华风。立我烝民，莫非尔功。立己达人，四海弟兄。修齐治平，天下为公。文德既修，远方来朋。寅协万邦，和而不同。弥高弥坚，圣自天纵。照临千秋，为祷为颂。神州复兴，百年之梦。法古开新，国祚久永。伏惟尚飨！

## 甲午(2014)年祭孔大典祭文

张立文

惟夏历甲午之岁，恭逢先师孔子诞辰2565年，谨以香花酒果，佾舞雅乐，敬奠于夫子暨诸圣哲之灵。其辞曰：

天地何来？人类何生？和实生物，同则不继。阴阳絪縕，五行相杂。万物化醇，实惟纲纪。汤武革命，应天顺人。惟德是辅，敬德保民。水能载覆，民贵君轻。无信不立，去食去兵。巍巍孔子，圣道昭明。复兴礼乐，挽澜扶倾。已达达人，博施于民。惟圣之德，万世永馨。天道刚健，地道柔顺。人道仁义，天下文明。天文察变，人文化成。诚意正心，修齐治平。知行合一，推己及人。仁爱民本，诚信正义。洪惟中华，绍宏文化。道德精髓，至善知止。势利纷华，不染尤洁。君子九德，进退守正。礼义为纪，各正性命。经国序民，坤宁乾清。多重世界，差分融突。和而不同，协和万邦。和平发展，合作共赢。命运共同体，寰宇辉煌。天人和美，身心和乐。家和则兴，国和则强。革故鼎新，自强不息。和合世界，幸福永享。伏惟尚飨！